



Број/ Број :  
Сарајево/ Сарајево: 10.3.2009.године

КОЛЕГИЈУ ОБА ДОМА  
ПАРЛАМЕНТАРНЕ СКУПШТИНЕ БИХ

ЗАЈЕДНИЧКОЈ КОМИСИЈИ ЗА ЕВРОПСКЕ ИНТЕГРАЦИЈЕ

КОМИСИЈИ ЗА ВАНЈСКЕ ПОСЛОВЕ  
ПРЕДСТАВНИЧКОГ ДОМА

## Z A B I L J E Š K A

**sa sastanka članova Zajedničke komisije za evropske integracije s delegacijom  
Zajedničke komisije za evropske poslove Parlamenta Irske,  
održanog u Sarajevu, 4.3.2009.**

Sastanku su prisustvovali članovi Zajedničke komisije za evropske integracije: Halid Genjac, Zoran Koprivica, Selim Bešliagić i Branko Dokić, članovi Zajedničke komisije za evropske poslove Parlamenta Irske: Bernard Durkan, Pat Breen, Jim Walsh, Ronan Gargan, Marianne Bolger, kao i Patrick McCabe, ambasador Irske u BiH, Patrick O'Reilly, zamjenik šefa misije, te sekretar Komisije za evropske integracije Vlatka Dangubić.

Sastankom je predsjedavao Halid Genjac, koji je, u ime Komisije, pozdravio delegaciju Zajedničke komisije za evropske poslove Parlamenta Irske i zahvalio se na pomoći i prijateljskoj podršci koju je u dosadašnjem periodu Irska pružila našoj zemlji.

U uvodnom izlaganju Genjac je govorio o Parlamentarnoj skupštini BiH, nadležnostima Zajedničke komisije za evropske integracije; o Sporazumu o stabilizaciji i pridruživanju i zastoju u reformama BiH; potrebi ustavnih reformi; strategijama o borbi protiv korupcije i kriminala, borbi protiv droge i borbi protiv trafikinga; liberalizaciji viznog režima, i o ekonomskoj situaciji u zemlji.

Na kraju uvodnog izlaganja predsjedavajući je zamolio kolege iz irske delegacije da, u Parlamentu, podrže ratifikaciju Sporazuma o stabilizaciji i pridruživanju.

Bernard Durkan, nakon što se zahvalio za organizaciju sastanka i za spremnost na saradnju, prezentirao je strukturu i princip rada Parlamenta Irske i Zajedničke komisije za evropske poslove. Govorio je o iskustvima u teškoj historiji Irske, opterećenoj stalnim sukobima između sjevernog i južnog dijela ostrva, mirovnom sporazumu „Dobri petak“, zaključenom u aprilu 1998. godine, kojim su postavljene dobre osnove za rješavanje nepovjerenja i predrasuda između suprotstavljenih strana. Naglasio je da mogućnost razmjene iskustava možemo bazirati na sličnosti naših zemalja.

Informirao je da se završetka procedure ratifikacije Sporazuma o stabilizaciji i pridruživanju BiH u institucijama Irske očekuje krajem mjeseca.

U raspravi nakon uvodnih izlaganja izneseni su stavovi različitih političkih opcija u pogledu na način i dinamiku reforme ustava i na ulogu OHR-a i visokog predstavnika u BiH.

Ističemo nekoliko interesantnih akcenata iz rasprave:

- saradnja u oblasti nauke i univerzitetskog obrazovanja;
- recesija i efekti recesije na privredu BiH;
- značaj korištenja pretpristupnih fondova;
- povezivanje privrednih komora i unapređenje privredne saradnje.

Bosanskohercegovačka delegacija tražila je podršku Irske u dobivanju statusa kandidata, što bi relaksiralo političke odnose u BiH.

U veoma prijateljskom nastupu irske delegacije, naročito je naglašen stav da se pitanje nepovjerenja u BiH mora prevazići. Irska će dati punu podršku kandidaturi Bosne i Hercegovine, nakon ispunjavanja svih uslova neophodnih za status kandidata.

Na kraju sastanka zaključeno je da je razmijenjeno mnogo veoma korisnih informacija i da se ovaj sastanak može okarakterizirati kao početak jedne uspješne i dugotrajne saradnje.

Predloženo je da se sljedeći sastanak održi u Dublinu.

Zabilješku pripremila:

Vlatka Dangubić, sekretar Komisije

Dostavljeno: Odjelu za saradnju s međunarodnim organizacijama

